

欽
定
全
唐
文

欽定全唐文卷五百一目錄

新文藝出版社藏書

權德輿 十九

唐故通議大夫守戶部尚書兼御史大夫持節充

朔方鎮西北庭興平陳鄭等州行營兵馬及河

中節度都統處置使兼管內觀察使權知絳州

刺史賜紫金魚袋贈揚州大都督府李公神道

碑銘 并序

唐故朝議郎使持節溫州諸軍事溫州刺史充靜

海軍使賜緋魚袋河東裴府君神道碑銘 并序

唐故義武軍節度支度營田易定等州觀察處置
等使檢校司空同中書門下平章事贈太傅上

谷郡王張公夫人鄧國夫人谷氏神道碑銘
并序

唐故章敬寺百巖大師碑銘

并序

唐故寶應寺上座內道場臨壇大律師多寶塔銘
并序

唐故東京安國寺契微和尚塔銘

并序

唐故洪州開元寺石門道一禪師塔銘

并序

唐故太清宮三洞法師吳先生碑銘

并序

欽定全唐文卷五百一

權德輿

十九

唐故通議大夫守戶部尚書兼御史大夫持節充
朔方鎮西北庭興平陳鄭等州行營兵馬及河
中節度都統處置使兼管內觀察使權知絳州
刺史賜紫金魚袋贈揚州大都督府李公神道

碑銘

并序

周道親親夾輔王室分唐叔以懷姓九宗職官五正故其
後文侯受秬鬯之命文公受大輅之錫祿勳推恩惇敘昌

大理道之所繇也國家憲章文武選建明德元功侯籍延
耀本枝初祖景皇帝之支曰鄭王亮實生淮安王神通用
親賢功德左右休運淄川郡王孝同淮安之昭也左衛作
右將軍燧淄川之穆也劍州長史贈太僕少卿廣業承祖

禰積厚之慶而生尚書尹三王都總六師帥八命四履投
艱難服勤勞有猷有守以至歿代禮賁於追命澤流於代
官有由然也尚書諱國貞字南華天資風采爲宗室儀矩
冽如寒泉嶷若崇山修身筮仕動有休裕開元十三年明
皇帝肆覲東后柴於岱宗以公族侍祠調補綿州參軍事

暴雨忽至江流泛溢公自下位能禦其災旣堅舊防仍復
故道累遷岐州錄事參軍太師苗公太尉房公繼爲二千
石皆所引重御史大夫張倚採訪關中表爲支使天寶末
林胡覆三川犯秦關詔除殿中侍御史爲襄陽郡司馬且
分戎政公以侍板輿辭革車換房陵太守表課尤異徵拜
長安縣令風政肅清改秦州刺史咸命中止復爲長安令
尋遷汴州刺史未及行復輟爲京兆少尹天子以公積有
誠效可居大官累命爲河南京兆成都尹劔南西川節度
使其撫周郊猘猢方熾公與太尉臨淮王議曰河洛爲天

下衝且無車賦比屋安堵寇將甘心焉不若虛其邑居挈以西去贏糧善地可俟師期繇是太尉壁河陽公次於陝伐謀銷患君子推其智其在京轂兵火之餘大命將泛物力亦屈而百役煩苦出於傷痍公曰元元愁歎受命惠養儻不能曠然丕變豈副明天子鬱悼之心耶列上蠲除悉蒙可報凡調於人者去其十九清靜愷悌百姓稱之其鎮岷峨裔人樂禍殺嘉榮二州刺史以開邊隙公命將疾攻舉無遺類明年昆戎圍我三城分遣銳師據便城壁戒嚴持重徼其極而擊之賈餘無前酣戰盡殪悉獻虜獲軍無

私焉鄰壤不靖偏師叛換將盜兵符已據城寺出車壓境
指顧而平凡三整武經而巴蜀軌道拊循安置四封畏其
威柄用者沮公勳猷徵爲殿中監命書旣下不俟駕行囊
被單車無道里費取倍稱之息五萬甫達京師上嘉而賜
之俾折其券寇有段子章者恣睢就戮方帥以告語聞詔
公宴見前席嘉獎且曰利兵積穀皆卿之素也其無駭卒
父之謂乎朝野嘉其首功而服其潔已臨淮王移鎮海岱
長轂在郊西邊北朔合淮陽圻父五諸侯之旅主盟中權
盡護諸將於是拜戶部尚書河中節度都統使又以職顯

戎重則風俗不阜加管內觀察使權知絳州刺史公外總
方畧內修班制當強弩之末無半菽之糧不忍加賦飛章
未下猶以憲度爲己任椎剽者斃之行師諸校譸張缺望
至是夜暮變起或以跳驅諭公公曰吾之不敏當死節官
下安敢貳偷以煩刑吏亂之刻也公竟及焉議者尚其絜
矩而哀其不淑時上元三年建卯月春秋四十八是歲改
元寶應至夏五月寧神於三原縣之北原詔以揚州大都
督府印綬告第憫其勞也公本諱若幽上元中天子以特
立之操爲宗工表率錫嘉名以更焉公忠儉誠厚方嚴密

靜用儒行憲令修明事功大玉不薨楚金必割凡歷官二十四自解巾至握節勤職十七其以內庭持書中執法亞丞相佩兩印以雄外服者又七命焉刺房陵之後五六年閒車不輟鞅賦職任功名聲章明及公以司徒總輿師令弟若水以內府司贊謁而太夫人福履所介日陳壽觴懷黃佩玉左右溫清極魯侯之燕喜邁張仲之孝友宜錫壽寵爲人倫龜龍曾未中身遭罹凶害前史稱霍去病亦有天幸然則命之所賦有幸焉有不幸焉斯不可問已夫人扶風郡君竇氏鴻臚丞光之女揚府長史御史大夫覲之

妹也淑明柔順克叶公志家肥族睦抑有助焉公薨若干年而夫人歿有子四人長曰錡材器碩茂潔廉忠肅遵修訓則復大其門入作卿士出爲侯伯貞元十五年以御史中丞剖符潤州宣風以宏禮俗成賦以殖財用大績茂焉中邦賴焉明年就加御史大夫十八年進禮部尚書撫封題劒如公渥命次曰鑑蘄州刺史次曰豐士鄆縣令幼曰豐器長安縣尉皆有幹裕而屈於年位今尚書永惟先公丕矩未刻金石以德輿嘗叨史職久掌贊書知王族大僚之事業見託論譔故不敢沒其美亦不敢溢其言銘曰

堯睦九族漢封同姓烈烈淮安乘時佐命淄川而下三葉
儲慶乃生我公紹續先正時惟宗英忠智廉清所至風行
所居理平山元朱組旣靖蜀京鉞鉞琕戈乃主夏盟交修
藩衛纂服宏大陟降左右勤勞翼戴隱微之間乃與禍會
夷途始半白晝中晦桓楹羽葆久閔鮮原煌煌密章肅肅
絲言盛德復祉藪茲後昆列郡是式价人維藩大江南服
考禮修職五曹十聯克嗣先德董是經費陳之藝極本於
教忠懋此宣力伊昔祭器實銘烝彝禮則有變魂遊在茲
連岡陂陀宰樹參差悠悠終古永錫斯碑

唐故朝議郎使持節溫州諸軍事溫州刺史充靜

海軍使賜緋魚袋河東裴府君神道碑銘

并序

春秋時賢卿大夫皆敘其代功舊德章明似續蓋黃流玉
瓚之寶產於深山清廟夏屋之材秀於中林其或爲珎爲
珎爲節爲稅無非禮神用備崇構洪河之東裴氏在焉自
魏晉迄今忠賢輩出士林以爲領袖史臣被於簡策而又
弈代降休且公且侯上嬪王姬出領方州者可得而言以
刻金石曰君諱希先字某四代祖懷節皇給事中工部侍
郎荆揚二州大都督府長史洛州刺史謚曰定曾祖昭歷

司門度支二郎中衛尉太府二寺卿祖確厯左右衛左右
金吾衛四大將軍太府卿太子詹事平陽郡開國公諡曰
貞自定公至貞公皆銀青光祿大夫以至烈考忸仕至郾
州刺史太子僕贈絳州刺史凡四代貴仕左曹二千石四
衛九列副冬官尹東朝禮及易名恩深追遠代修其業鍾
美於君君寬裕博厚恭儉莊誠資性端直詞氣閑雅於經
書泛爲疏達而不窮章句於吏道通於理術而不求聞問
自解巾至於捐館凡厯十一官無疵政無違德祇守家法
奉以周旋仕於官朝始爲僕寺進洗馬中允再爲家令仕

於王國歷濟陳蜀三府初爲騎曹掾次爲長史次爲傳其
初又爲壽安丞後牧臨邛乃遷永嘉班宣六條撫柔二郡
惠和所被夷越嚮方其在朝也以鼂錯之智王陽之道而
滯於散地恬於久次其剖符也仁恕愛利而必易簡奉法
循理亦不細苛居三年以疾受代貞元六年冬十一月歿
於鍾陵之私第享年若干明年八月返葬於長安少陵原
之舊塋以夫人永年郡主祔焉禮也惟郡主元宗之孫今
皇帝之從祖姑也儲是慶靈生而洵淑窈窕德象婉婉聽
從備柔嘉之行成肅雍之道初天寶十三年詔選資地才

令以府君有安仁武子之美而下嫁焉齋莊以主中饋和
樂以宜姻族作配君子禮同家人嚴祭祀服澣濯者三十
六年而歿春秋五十八歲貞元五年也鍾陵之守臣以聞
上不視朝率禮有加嗚呼以公之率履永年之仁淑宜其
繁祉壽考子孫繩繩而生不極其道歿無主其後此伯道
之痛碩人之詩所由作也遺命以兄之子某爲嗣乃列其
祖代官伐請刻豐碑辭之不獲乃繫詞曰

河東右族蕃衍紹續代功世祿昌而熾兮乃生永嘉剖符
承家實而不華喻於義兮二邦靜謐禮之善物朱轡赤芾

鍾定公集卷之五十一
以爲貴兮有齊永年作儷仁賢佩玉鏘然四德備兮天漢
之尊平王之孫爛其盈門恭祀事兮返彼元壤少陵之上
終古悽愴金石識兮

唐故義武軍節度支度營田易定等州觀察處置
等使檢校司空同中書門下平章事贈太傅上
谷郡王張公夫人鄧國夫人谷氏神道碑銘并
序

皇帝以文明御方夏以德禮序人倫貞元十二年秋九月
詔侍臣德輿以故義武節度檢校司空同中書門下平章

事贈太傅上谷郡王張孝忠夫人谷氏之淑行內則俾刻金石臣聞風有采蘋采蘋易曰中饋貞吉所以表柔明於內子昭節信於元侯宣力獻功抑有其助夫人之先魏郡昌樂縣人也在漢元成之代衛司馬吉以勲勞致命於絕域大司農永以文學盡規於本朝前史書之以勵臣節四代祖那律皇朝諫議大夫宏文館學士正直之道播於清時曾祖補袞左羽林軍長史祖倚相祕書省正字仍代藏器晦而不耀考崇義天寶末有行師北鄙之勞累書勲伐至左金吾衛大將軍兼殿中監贈特進夫人卽特進府君

之第八女也稟是門風鍾於女士淑閒之度中外宜之初
太傅始自軍校建功河朔克彰婦順敬贊宗事正位於內
尚柔有儀洎太傅自易部領常山遂分節旄以至公相上
畧兼資於明智中壺載揚其惠和二姓有輝六姻是憲盡
綸翟之飾動珎璜之聲建中元年封魏郡夫人三年進封
鄧國夫人旌淑哲也鵲巢之均一家人之悔厲籩豆敬齋
之色琴瑟靜好之儀夫人備有焉帷堂晝哭良弓繼志上
慈下厚就養無方此又令嗣之能致其敬也貞元十一年
冬以門承勲績之崇恩有選尚之貴方築外館聿來上京

十二年二月丁卯以疾終於萬年縣安仁里私第年四十
九遺章上陳敬而得禮皇情憫惻恩贈有加嗣子茂昭義
武軍節度易定等州觀察處置等使起復左金吾衛上將
軍檢校工部尚書定州刺史兼御史大夫延德郡王博陵
上谷之師以續休緒戎車委重優詔抑情次曰茂宏雅王
府司馬茂宣舒王府長史嗣雍杞王府諮議參軍嗣慶試
將作少監兼御史丞幼曰茂宗銀青光祿大夫行光祿少
卿員外置同正員駙馬都尉皆以純孝裕蠱居喪執禮以
其年冬十月甲戌奉夫人之輅車葬於京師少陵原不祔

舊封式遵古道恩延戚里有命從之初夫人之兄從政實
傳戎韜之訓以中執法剖符定州有妹四人所天皆貴異
姓之社從夫以尊公宮之教率性而中象服交映魚軒並
馳其後婚親無非勲德故太尉中書令西平王今太尉中
書令瑯琊王夫人之姻也納徵佐餽焜燿於一時此又閨
門之盛而積善有類也柔正之風本於王化愷悌之澤洽
於幽泉此臣之所以拜受德音銘諸樂石也銘曰

在漢子雲倂然中正昌言獻可遠緒傳慶降及特進策勳
斯盛乃生夫人如玉之溫婉彼淑質宜乎盛門金鉉石節

所從益尊亦旣晝哭道彰訓育中權之貴克繼藩服下嫁
之榮方承湯沐生也有涯壽胡不遐奄然冥漠喪此柔嘉
遽還黃壤空悲白華秦原隱嶙丹旆徐引此焉幽宅自昔
同盡追琢徽音終古不泯

唐故章敬寺百巖大師碑銘

并序

禪宗長老百巖大師之師曰大寂禪師傳佛語心法始自
達摩至於惠能之化行於南服流於天下大抵以五蘊九
識十八界皆空猶鏡之明也雖萬象畢呈而光性無累心
之虛也雖三際不住而覺觀湛然得於此者卽凡成聖不

然一塵瞥起六入膠固循環回復於生死之中風濤火輪
迷忘不息授受昭合大師得之一言宗通深入無礙師諒
懷暉姓謝氏東晉流寓今爲泉州人孩提秀發博究書術
一旦慨然曰我之祖先今安在耶四肢百體視聽動用孰
使之然耶漼然雨泣改服緇褐志在楞伽行在曹溪得圓
明清淨之本去妄想因緣之習百八句義照其身心心離
文字化無方所於是抵清涼下幽都登徂徠入太行所至
之邦蒙被法味止於太行百巖寺門人因以百巖號焉元
和三年有詔徵至京師宴坐於章敬寺每歲召入麟德殿

講論後以疾固辭十年十二月二十一日恬然示滅其年六十其夏三十五弟子智朗志操等以明年正月起塔於瀨陵原凡一鎗所傳一雨所潤入法界者不可勝書著法師資傳一編自雞足山大伽葉而下至六祖能秀論次詳實或問心要者荅曰心本清淨而無境者也非遺境以會心非去垢以取淨神妙獨立不與物俱能悟斯者不爲習氣生死幻蘊之所累也故薦紳先生知道入理者多遊焉嘗試言之以中庸之自誠而明以盡萬物之性以大易之寂然不動感而遂通則方袍褻衣其極致一也嚮使師與

孔聖同時其顏生閔損之列歟釋尊在代其大慧綱明之
倫歟至若從師受具之次第宰臣大官之尊信誕生入滅
之感異今皆不書德輿三十年前嘗聞道於大寂聿來京
下時款師言頃因哀傷似獲悟入則知煩惱不遠菩提雖
聚散於此生期會歸於彼岸銘曰

西方之教南宗之妙與日並照百巖得之爲代導師頰若
琉璃結火焰性愛流溺正癡冥奔命卽心是佛卽色是空
師之通兮無來無去無縛無解師之化兮揭茲靈塔丹素
周匝示塵劫兮

唐故寶應寺上座內道場臨壇大律師多寶塔銘

并序

京師東門二里所多寶塔者沙門靈湊等爲先大師薦祉
盡敬之地也大師諱圓敬姓陳氏河南陸渾人報年六十
四經夏四十四以貞元八年春正月厭代入滅於保壽寺
越十有五日遷窆於龍首北原距茲塔西北十餘步初大
師入道依本縣思遠寺微公通法華經寶應二年制度編
僧籍於東京長壽寺受具於白馬寺本律師曇無德義言
下信解以爲導道途而歸都邑涉門闕而躋堂皇故尸羅

毗尼以攝妄想五部四分是爲局鍵然後因定發惠登最
上乘優婆鞠多由是道也敷暢微妙攘除癡冥如一燈傳
照一雨潤物宏我法者可勝道哉代宗朝徵入內道場累
詔授興善安國寶應等寺綱首又充僧錄尋授寶應寺上
座賜律院以居授瑜伽灌頂密契之法講楞伽經起信論
譯虛空藏經鑒義潤文內典羣書靡不該貫無非宴坐道
場沃天心以了義照佛日於中禁鬱爲龍象大拯斯人將
滅之夕備申告誡中夜累足如期順化其智惠歟其解脫
歟法子苾芻繖服成列仰護念慈哀之旨拾蓮華多寶之

義厥後十五年而功用成丹素胍稜石輪火齊施於外聖
像真言多羅祇夜函於內又以見湊公成就付囑而爲上
首況不出戶庭持經萬徧願力斯滿嚴飾斯崇勒銘於茲
以示塵劫銘曰

三生不駐如電如瀑七情相攻如蠆如蝮彼上人者爲世
導師乃精毗尼以攝羣疑宏道日大化緣斯畢建茲嚴事
如地踴出國門之東萬寓來同斯爲寶所燭耀無窮

唐故東京安國寺契微和尚塔銘

并序

和尚俗姓權氏法諱契微天水畧陽人十代祖安邱敬公

翼爲前秦僕射事備載記曾祖文誕皇銀青光祿大夫涪
常二州刺史荊州都督府長史平涼郡開國公祖崇本皇
朝散大夫滑州匡城縣令與兄戶部郎中崇基水部員外
郎崇先皆以文學政事顯名於貞觀永徽之際考同光皇
河南縣尉長安縣丞翰林詳定學士與伯兄益州成都縣
尉無侍仲兄歛桂梓三州刺史若訥三人同以大名舉進
士擢第文章之美爲當時冠首然其世德鍾慶若後無達
者則有以清淨住世故和尚生而敏悟超然元覺年九歲
於薦福寺金剛三藏發心入曼荼羅道場傳持聖印悟入

之速發於岐嶷然其德容具舉家族敬異將必擇卿士之
良者以嬪之時勇於出世至欲刃其膚以自免翰林府君
旣捐館母兄竟不能抑遂以初筭之年被服緇褐至天寶
元年始受具於福先寺定賓律師隸東京安國寺師事苾
芻尼無勝受心門方便之學以爲心實境化真由妄遣遣
之而真亦隨盡化之而心乃湛然故外示律儀內循禪悅
因初心而住實智離有相而證空法乃通四部經於宏正
大師尤精楞伽之義而後住無住證洗六妄離二邊遵大
道以坦蕩入法流而洄瀆以深惠善誘誨學徒或權或實

爲歸爲趣亦猶淨名之隨機攝導蜀嚴以忠孝爲言故中外族姻徧沐其化漸漬饒益可勝道哉初以廣德中隨其家南渡安居於蘇州朱明寺以建中二年九月六日冥然化滅報年六十二經夏四十一弟子尼惠操又其兄子也故探其義味最爲深入乃率籲緇俗號捧金身建塔於東武邱寺之東北岡從其教也姪孫德輿以爲宣父有西方聖人之說東漢有浮圖仁祠之教以其教言之自菩提達摩七葉至大照祖師皆以心法祕印迭相授受故戒生定定生惠得第一義者冲而詣之嗚呼今其詣之矣桑門紀

述多不分系緒今備書者亦所以無忘先德故其文也繁
銘曰

教旨清淨戒珠圓映識浪情塵還源反性彼一切見皆妄
想生精修密詣湛爾融明示現者何此身非久強爲之銘
以焯於後

唐故洪州開元寺石門道一禪師塔銘

并序

鍾陵之西曰海昏海昏南鄙有石門山禪宗大師馬氏塔
廟之所在也門弟子以德興嘗遊大師之藩俾文言而揭
之曰三如來身以大慈爲之本六波羅密以般若爲之鍵

非上德宿殖者惡乎至哉大師法諱道一代居德陽生有異表幼無兒戲嶷如山立湛如川淳舌廣長以覆準足文理而成字全德法器自天授之嘗以爲九流六學不足經慮局然理世之具豈資出世之方惟度門正覺爲上智宅心之域耳初落髮於資中進具於巴西後聞衡岳有讓禪師者傳教於曹溪六祖真心超詣是謂頓門跋履造請一言懸解始類顏子如愚以知十俄比淨名默然於不二又以法惟無住化亦隨方嘗禪誦於撫之西裏山又南至於處之龔公山攬搏者馴悍戾者仁瞻其儀相自用丕變刺

史今河南尹裴公久於稟奉多所信嚮由此定惠發其明
誠大厯中尚書路冀公之爲連帥也舟車旁午請居理所
貞元二年成紀李公以侍極司憲臨長是邦勒護法之誠
承最後之說大抵去三以就一捨權以趨實示不遷不染
之性無差別次第之門常曰佛不遠人卽心而證法無所
著觸境皆如豈在多歧以泥學者故夸父嚙詬求之愈疎
而金剛醍醐正在方寸於是解其結發其覆如利刃之破
罽索甘露之洒稠林隨其義味快得善利者可勝道哉化
緣旣周趺坐報盡時貞元二年四月庚辰春秋八十夏臘

六十前此以石門清曠之境爲宴默終焉之地忽謂入室弟子曰吾至二月當還爾其識之及是委化如合符節當夾鍾發生之候叶拘尸薪火之期緇素幼艾失聲望路渡涸流而法雨滂灑及山門而天香紛靄天人交際昧者不知沙門惠海智藏鎬英志賢智通道悟懷暉惟寬智廣崇泰惠雲等體服其勞心通其教以爲吾師真心湛然與虛空俱惟是體魄化爲舍利則西方之故事傳焉不可已也乃率籲其徒從茶毗之法珠圓玉潔煜燿盈升建茲嚴事眾所瞻仰至七年而功用成竭誠信故緩也德興往因稽

首僊獲擊蒙雖飛鳥在空莫知近遠而法雲覆物已被清涼今茲銘表之事敢拒眾多之請銘曰

達摩心法南爲曹溪頓門巍巍振拔沈泥禪師宏之俾民不迷九江西部爲一都會亦旣戾止元津橫霈慈哀攝護爲大法礪五滓六觸翳然相蒙直心道場決之則通隨器受益各見其功真性無方妙道不竭顧茲夢幻亦有生滅微言密用煥如昭晰過去諸佛有修多羅心能悟之在一刹那何以寘哀茲宰堵波

唐故太清宮三洞法師吳先生碑銘

并序

雲出於山遊於天復歸於自然先生之道似焉涵泳乎道
之樞徜徉乎物之初以生爲蘧廬復返有而入無先生諱
善經縉雲仙都山人也自曾王父而下皆質誠孝敬登聞
於鄉黨先生未成童博貫儒書讀道德經至爲學日益爲
道日損三復恍然曰吾知之矣改習四真靈寶等經年十
七本郡以制度居縉雲山其後遍登匡廬天台三茅句曲
泛然不囿於物虛已以遊代乘彼白雲至於帝鄉時宰王
黃門將爲太清宮使奏隸官籍乃從沖虛申先生受三洞
經法貞元中於宮院立仙壇躬上士勸道之誠宏大君受

釐之重陰功幽贊何可勝言德宗錫以纂節幡珮靡有不
備初沖虛之師曰清簡泉君泉君之師曰來君來君之師
曰萬君皆有遺像在開元觀先生乃茲焉宴息立申泉二
碑以發天光以極師道凡儒元宿學有道仁人貴遊象服
男夫女士傳三景真籙者五百餘人一旦謂入室弟子曰
天行物化吾之晦明其動也與物皆春其靜也與化爲一
成形待盡吾何爲哉乃於畢原近郊修露仙隱景之地元
和甲午冬季朔旦齋沐潔清與其徒元言終日越三日焚
香朝拜泊然返真明年正月寧極於露仙館其年八十三

矣其受道也有反風晏溫之景其委化也有清香靈鶴之祥斯又不可涯已嘗以爲無心者與物冥則未嘗有對於天下順性命而遺耳目其在是乎其餘奔走於蹇淺倒置之中吾不爲也所注道德經并著文二十篇元覽至賾通乎微妙嗟乎先生之容不可得而見矣先生之言不可得而聞矣但糟粕具在神明不滅采真者得以虛心道門威儀趙常盈徧得先生之學與符洞幽周元德晏元壽董太珣等或關尹受教或庚桑爲役有年數矣吳郡歸沖之廣平劉素芝天水權載之皆從先生遊者也元德狀其崖畧

授載之以金石刻噫嘻老龍吉死矣安所發予之狂言哉
乃銘曰

萬情弊弊謬繳之內先生懸解遐視區外族系於東吳稟
靈於仙都演道於明廷棲神於太清隱機於開元歸根於
露仙其來適然其去寥然大圓清兮大方厚元鄉返駕兮
無何有刻介石兮茲不朽

欽定全唐文卷五百二目錄

權德輿 二十

金紫光祿大夫檢校禮部尚書使持節都督廣州

諸軍事兼廣州刺史御史大夫充嶺南節度支

度營田觀察處置本管經畧等使東海郡開國

公贈太子少保徐公墓誌銘

并序

尚書司門員外郎仲君墓誌銘

并序

故朝議郎行尚書倉部員外郎集賢院待制權府

君墓誌銘

并序

金紫光祿大夫司農卿邵州長史李公墓誌銘

并

序

朝散大夫守司農少卿賜紫金魚袋隴西縣開國

男李公墓誌銘

并序

監察御史清河張府君墓誌銘

并序

朝散大夫使持節都督容州諸軍事守容州刺史

兼侍御史充本管經畧招討制置等使譙縣開

國男賜紫金魚袋戴公墓誌銘

并序

朝散大夫使持節饒州諸軍事守饒州刺史上柱

國崔君墓誌銘

并序

欽定全唐文卷五百二

權德輿 二十

金紫光祿大夫檢校禮部尚書使持節都督廣州
諸軍事兼廣州刺史御史大夫充嶺南節度支
度營田觀察處置本管經畧等使東海郡開國

公贈太子少保徐公墓誌銘 并序

公諱申字維降東海郟人五代祖周宣州刺史瓌瓌生隋
江州司馬宴宴生吉州太和丞仁澈仁澈生皇吏部郎中
諫議大夫元之元之生公烈考汾州司戶參軍贈信州刺

史又大凡自偃王而下用仁義世其家諫議之文行信州之廉退及公始大永泰初當著作賈常侍至操柄儀曹掌士林之菁華舉進士上第調補祕書正字四征翹車相屬於途望公舉趾以爲重九江而西服嶺而南與朔塞被邊之地聯爲命介厯大理評事司直監察御史太子司議郎殿中侍御史錫以章綬冀國路公之誅哥舒晁也公以從事主謀居多嗣曹王之守鍾陵而誅李希烈也公以長史行刺史事調州師以護饗道厥勞茂焉江漢旣清拜韶州刺史先是長史不任職官曹弛廢刺史寓於理下邑之令

丞與編人雜處比屋庸亡公田爲蕪公乃假之耕牛賦與種食人人自占視其力而爲之制歲乃善熟積爲倉箱於是計徒庸程日力作爲城寺大治垣屋廩置市列道橋器用皆備焉罷去之日夫家名數倍差於始至而不書於籍邑子張棣等五百人獻其理狀得請於觀察府以函奏書請立碑祠公瞿然止之曰此刺史職耳一旦上聞與沽伐者何異所不忍爲也府不能奪改合州刺史以先濮陽郡太夫人兆域未祔表求改葬總麻旣除以御史中丞領景州刺史自兵興四十年山東諸侯率强大驕蹇郡二千石

多自命於轅門蓋縣官息人舍垢而因緣漸漬然也至是
朝廷以滄州負海勁兵攸處乃建節將幕庭裂屬城以置
支郡會其帥亦請缺守於朝朝論難之二府比推擇未稱
因召公入見而面命焉錫命服文馬緡錢五百萬尋加節
度副使中朝之條職憲令始被於景人是歲節度使來朝
旣從父兄爲代表公以本官爲軍司馬陳情去職徵還京
師復以御史中丞出莅邕州領經畧之任開南蠻徼道宣
明威信種人黃氏納質請命化條風行獷俗以清明年中
貴人持兵符詔書至部以御史大夫督南海二十一州軍

事而節制焉前此守臣物故軍吏乘變竊發印符易置部
校拔用惡少年百輩軍中幾亂相率亡命公旣至捕誅首
惡悉原諸誑誤者夷越負險阻白晝攻剽芟夷根株使無
遺類然後布以寬大人安作業溟漲之外巨商萬艦通犀
南金充牣狎至天子之恩澤賜予聲明物采皆待焉上應
急宣以馳疾傳下無強賈用絕姦利和輯招徠外區懷之
則四封之內其理可知也朝典疇庸進階至銀青光祿大
夫時庸蜀未靖公密疏請發卒徒五千循伏波故道由夔
蠻抵岷峨以會師期誅不恪詔可其奏就加禮部尚書秩

正三品疏封東海命書未及至奄捐館舍遂以太子少保
印綬弔祠稱焉是歲改元元和公之生七十年矣嗚呼以
文發身以智經物惠和直溫忠恪廉清佐賢侯長轂皆有
理效在詔也興事功在景也修班制朗寧察風俗南海整
師律以八命居六官攸好德考終命其蹈履之全乎夫人
渤海高氏早歿繼夫人扶風郡夫人竇氏柔明有賢行嗣
子右衛倉曹元弼似續文敏號咷毀慕以某月日寧神於
東都偃師縣之某原乃刻堅石以傳永久銘曰

噫徐公有質有文有義有仁名聲章明邁羣倫兮噫徐公

不忤不求不緇不磷贊佐四征暢嘉聞兮公之牧人於韶
於景於邕於廣朱旛照路利攸往兮公之愛人以清以靜
以惠以養流庸集附如景響兮如何不傭奄忽鞠凶蒼龜
之同天地之中吁嗟乎徐公

尚書司門員外郎仲君墓誌銘

并序

君諱子陵字某其先魯獻公仲子曰山甫入輔於周食采
於樊其後魯有季路衛有叔圉用儒行政事代爲家法曾
祖訥始自彭城徙於蜀都祖襲博究六藝州閭推重考遠
清靜寡欲好老嚴之言三代曠僚純白不耀君卅歲好古

學與同門生肄業於峨眉山下採摭前載可以爲文章樞
要者紬繹區別凡數十萬言大厯十三年舉進士甲科調
補祕書省校書郎厯同官醴泉二縣尉貞元十年舉賢良
方正拜太常博士轉主客司門二員外郎十八年六月乙
巳寢疾歿於靖恭里第享年五十有九君修身慤固爲學
精力其初典校有詔百執事詳定冕服炳然上奏得禮之
中再仕甸內皆參奉常論譔之務后蒼二戴曲臺石渠之
論乖疑難正者咸折中焉有司請正太祖東嚮之位而桃
獻懿二主議者云云君議畧曰九聖在天二祖在桃國家

卜代其年未始有極宜立定制爲萬代程請遷二主於德
明興聖廟詞甚切正後以異論紛紛又著通難一篇引經
據古諸儒不能屈雖留中未下而知禮者直之爲郎三歲
受詔典黔中選補賦祿清平南人悅焉皇皇者華道於故
里里中人以爲榮觀復命踰年稍進郎位循性詣理恬於
聲榮隤然放懷以馮唐顏驄自況修詞甚博推本六經賦
詩類事往往有卓異不羈之韻邃於禮服上下古今儀制
著五服圖十卷自爲一家之言起庸蜀諸生以文義自達
至禮官元士三登於朝講義洽聞不疚不跲與夫憑覆露

乘地資而至大僚豐祿者難易殊矣子雲耆老相如多病
內外灑埽之日圖書尊酒而已升東榮而復者假他人之
室可悲也夫其嫠嗣郢王之藻女宗室公官稱其賢淑生
一子無頗幼學而孤卜七月甲申薨於萬年縣之某原其
理命也德輿常忝知君用深怛化遺孤哀請因直其詞銘
曰
噫仲君直而文心秉彝學軼羣富宏議暢嘉聞中止水外
浮雲理冥冥化沄沄刻圓石識幽墳

故朝議郎行尚書倉部員外郎集賢院待制權府

君墓誌銘

并序

公諱自挹字某天水人其先殷王武丁之支因封命氏楚
遷於邠處秦徙於汧隴縣代多才繼有勳力四代祖襲慶
周開府儀同三司相定冀青殷五州諸軍事冀州刺史齊
郡公曾祖武隋開府儀同三司浙豫桂三州刺史潭府總
管始平郡太守右武衛屯衛二大將軍天水縣開國伯考
無悔皇朝請大夫晉州趙城縣令公年十四太學明經上
第因喟然曰學不足以究古今之變而干祿者非吾志也
遂養蒙於終南紫閣之下窮覽載籍號爲醇儒非其道不

合非其人不自厯南和寶鼎二縣尉天寶中河湟之閒踐
更以禦寇平糴以饋軍皆以御史董之聯辟從事旣而幽
陵兵興二京震蕩搢紳之士多在劫中公艱貞終吉盜不
能汚剋復之歲制授醴泉縣尉尋攝監察御史充河西隴
右宣慰使崔中丞伯陽判官輅車所履人誦其惠歲中崔
復命遷左馮翊表爲祠曹且佐州帥朝廷以公文而無害
特拜監察御史謙以自牧換大理寺丞學該古今加集賢
院待制識通理典遷尚書倉部員外郎大厯五年春感風
疾請告十有二月終於布政里私第享年七十惟公得大

易之含章中庸之居易知前古之善敗稽六學之義類靈
龜恬然天爵自貴夫如是則通籍書殿起草中臺於諸生
不爲不達而充公之量則未也與故王右丞維今歸尚書
崇敬爲文雅道素之友其餘或不踐其域故知我者希夫
人太原王氏監察御史造之孫鄠縣令侑之女淑行明德
輔於公志叢是福履近於期頤公之喪旣除二十三年而
夫人歿壽九十三時貞元十年十有二月也嗣子某某官
次子某某官等皆以舊德蕃祉參居吏員盡厥誠信貞於
龜筮以十二年十月祔葬於咸陽縣洪瀆原禮也以德興

諸孫之列習於舊史郊子之學誠慚古人滕公之室敢識
幽壤銘曰

周隋之間受封於齊代有武功抑抑倉部德音不回藹然
儒風考正圖書彌綸憲章其道昭融黃裳之吉大雅方直
位則未充惟此令德與彼內則委辭而終咸陽古原祔窆
雙魂淑聲無窮

金紫光祿大夫司農卿邵州長史李公墓誌銘

并

序

公諱銘字某不書州里尊宗室也初景皇之支啟封於蔡

繼別爲宗厥後多材皇襲濟北郡公孚公之曾祖也隴西
郡公津容公之王父也濟北仕至國子司業贈太僕卿隴
西仕至慈衛汝邢青五州刺史終永王傅以至烈考憺歷
監察御史殿中侍御史尚書倉部員外郎累贈職方郎中
虢州刺史公卽虢州府君之第若干子也憑是積厚叢生
福祉少以門子入官聯調兩宮環列之佐次補伊闕丞是
歲天寶十四載也虢州捐館幽陵兵起姑毒違難南浮江
淮旣除喪宣州觀察使鄭旻之表爲廣德令時劉展阻命
東方愁擾閭里制於萑蒲守臣化爲寓公而公之縣鄙連

金史卷之二十一
二
亘山洞盜有陳莊陳五奢者是焉囊橐攻剽相因炅之跳
在尋陽牒書密至署爲上介俾輯輿師靖綏攘遏人用寧
舒後厯揚州太原二紀綱掾府之損益皆所關決執法殿
中佐戎北門會罷使至京師獻狀居最拜奉天今有命成
城績用居多未踰年遷侍御史充宣武軍節度行軍司馬
時師帥以睢陽及譙進律開府韓厥之任朝選爲難蓋以
彌縫左右非公莫可最凡三爲尚書郎四兼御史中丞以
銀印青綬厯官相常伯之重府遷大梁職尊統師公皆以
師武從之蓄資力以崇威望宣忠勞以宏班制居則持重

戰則有功無細無大緊公謀是賴雖羊舌職之聰敏肅給
鐸遏寇之恭敬信強無以過也貞元二年真拜右庶子三
年復以本官兼御史中丞充入蕃使尋兼御史大夫行次
回中察其陰詐奏疏累陳不可莅盟之狀時朝議已行謀
塞不用旣而戎人衷甲急變上聞乘車東轅獨以智免以
久次遷衛尉卿秩至金紫乃命大司農爲國之泉首公修
職惟直是視無所阿附終用蔽傷左遷邵州長史以十三
年十一月寢疾終於所莅之官舍春秋若干惟公開敏毅
直信兼仁勇有政事方畧長於理煩遠而不泥文而無害

始以通邑行師振其名聲交辟元僚翻飛清朝腰金鳴玉
法象河海議者謂藩垣京轂公宜居之終以當官有守寧
絀不苟不爲利疚於回鬱堙下國以至大病斯可歎已夫
人范陽郡夫人盧氏某官某之孫新安丞某之女華宗淑
問光輔閨門無貽懼無攸遂內姻外戚仰其徽風先於公
二年而歿長子元亮以武畧至御史中丞不幸早亡次子
元道以吏才爲大理司直兼監察御史參陳許軍事次曰
元規進士及第盤屋縣尉次曰元會前右金吾衛兵曹參
軍元簡江陵府參軍元舉太原府參軍元衡元弼元輔等

皆幹蠱知方儼然在疚考於象數先遠得吉以十四年某
月日奉公夫人之喪附窆於伊闕縣萬安南原先公之兆
域禮也德輿王父公族之出也先人於公爲中表昆弟羈
貫獲見殆四十年元道等泣以墓石見託雖文之鄙朴而
不敢辭也銘曰

抑抑司農系於蔡兮三珪再踐直方大兮心廣體胖道將
泰兮中立不回官左退兮發書問鵬禍所會兮撰日煇龜
紛祖載兮萬安鮮原風雨晦兮鏤此貞珉隧之內兮

朝散大夫守司農少卿賜紫金魚袋隴西縣開國

男李公墓誌銘

并序

公諱條字堅後以字爲諱淮安靖王贈司空神通之元孫也鹽州刺史孝銳司空之昭也宏農太原守璟鹽州之穆也太子太傅贈司徒齊物公之禰也尚書左僕射贈司空復公之兄也代以忠厚而膺爵命勲籍吏部皆冠宗室公秉是慶祉生而朗邁宏毅疏達方廉孝悌學以遜志文而無害始以門廕參調三命官至廷尉平明清閱寔適其輕重改宣城令滿歲受代縣人以理狀乞留廉車上聞詔可其奏且加大理司直從人欲也縣鄙之南水泉委匯每暑

雨流潦輒傷大田公乃峻爲之防悅使其衆人就安利稼
皆登成大厯中鄜坊節度使表爲上介遷監察御史殿中
侍御史中權策畫一以咨之成師足食邊備益固使罷除
昭陵臺令貴強胥貪奸冒法禁公職在充奉露章以聞已
爲巧言所中坐貶建安尉在途累疏詞理劇切上覽而直
之罪人就誅方議率復屬太夫人棄敬養貞元初移蘄州
長史尋徵還京師執事者銳意引重公亦啟心獻納會一
人有漢宣共理之嘆拜泉州刺史泉人宜之入爲宗正丞
時卿長與其貳不相能告訐之書紛然交訴詔公平之皆

得其中自後屬籍疑讞顓其聽斷兩造以明九族以和九年授果州刺史先是理下無解署官司無令書節用量功經構講聚百堵乃興九章粲然政用樂易人皆輯附居部明年有女道士謝氏白晝上昇優詔嘉異州閭咏歎十一年以課最陟爲司農少卿國泉邦用精力區處利病陳聞靡不纖悉十四年宸心憫雨比屋艱食出其陳陳以活元元又百吏之祿廩以粟易幣則輕重相準而便於人皆自公發之也公稽覽故志通練程品嘗獻軍國便宜五章推理道以及人事其他奏議皆附經術有蹇蹇匪躬之操焉

渥澤日加方厚其屬任而才命相戾末如之何十五年三月乙巳以疾終於勝業里私第享年五十九夫人滎陽鄭氏某官某之孫某官某之女姿操柔明先於公若干年而歿乃者以公之勤追封滎陽縣君其孤曰昌舉進士甲科淑行至性公族稱其有後以其年五月甲寅龜筮襲吉血涕奉喪祔葬於萬年縣某原先公之兆域以德輿獲詳踐履俾篆斯文其銘曰

昔有靖王愍策司空至公父兄亦命三公公族家代車服以庸允矣司農直方懿恭行惟遜悌仕乃廉忠利刃剗鐘

輕翰翔風時方大來命則不融柳車遲遲棘人充充如履
厦屋歸念舊封圓石篆銘永識於中

監察御史清河張府君墓誌銘

并序

君諱眾甫字子初清河人曾祖尚皇海州司馬祖宏藝皇
兗州曲阜縣令考隱皇淄州司戶參軍君早爲諸生能以
學行自力寬廉而溫朴厚而文居易向晦固窮不變故年
過耳順而方脫章甫冠惠文示不苟也初爲轉運司所辟
解巾太常寺太祝轉河南府壽安縣尉罷秩歷年僑居雲
陽時以緣情比興疏導心術志之所之輒詣絕境閒以羈

旅游京師卿大夫聆其風者方以聲韻屬和不暇會淮寧
軍帥之始至也慎柬僚佐求士於朝朝賢多以君爲才辟
書荐至俄拜監察御史且爲從事讜言幕畫舉無違者徵
軍實於廣陵因涉江省家道病沈痼不克復命以建中三
年三月日至家而終享年六十八夫人汝南周氏先於君
歿其孤曰實曰宇年並孩齔未勝縗經遂以某月日權柩
焉嗚呼貴仕耆壽或與令德不并此昔賢所以爲歎姑以
景行茂實貴於重泉銘曰

洪範之義享用五福展如之人宜荷百祿嘉言婉婉則罔

攸伏既鐵其冠亦朱其服浮休汙汙歸全還真喬木荒墳
吁嗟乎張君

朝散大夫使持節都督容州諸軍事守容州刺史

兼侍御史充本管經畧招討制置等使譙縣開

國男賜紫金魚袋戴公墓誌銘

并序

維貞元五年夏四月容州刺史經畧使侍御史譙縣男戴
公至部之三月以疾受代回車甌駱六月甲申次於清遠
峽而薨春秋五十八明年正月庚申返葬於金壇玉京原
之舊封宜敘世德以識幽窆云公諱叔倫字幼公本譙國

人其先在宋爲公族於漢爲儒宗東漢則有司徒涉西晉則有司農遂遂後南渡始居丹徒八葉至宋臨湘侯明寶明寶曾孫梁左丞曷曷元孫皇德州司士好問公之曾王父也王父修譽父眷用皆自縻天爵不顧輶車傳次君之禮文盡通與旨師安道之晦德尤惡知名故世風純慶及公而發公早以詞藝振嘉聞中以材術商功利終以理行敷教化師履素王之訓周旋君子之儒淑聲休問苾芬四暢初樞衣於蘭陵蕭茂挺以文學政事見稱蕭門文本菁華而長於比興粲爲采章鏘如珎璜鼓鐘於宮累辟大府

分命於計相也則爲湖南河內留後自祕書正字三遷至
監察御史曳裾於賢王也則爲湖南江西上介由大理寺
司直再轉至尚書祠部郎中其阜人成化也則東陽一同
之人沐旬歲之治撫人飫三年之惠容人被踰月之教夔
人聞詔而歡承訃而哀不及蒙其澤厯官十一而雲安不
書所至之邦必刻金石始在轉運府也董賦於南荆會蜀
將楊琳擁徒阻命詔書告諭初無革志宵引銳卒劫脅使
臣曰歸我金幣可以紓死公山立不撓勇生於仁端其詞
氣強於師旅暴叛知感乞盟於公黎明率其徒西嚮拜泣

指期詣闕冢臣列狀天子召對而推功於府不伐其勞時
談翕然勇讓具舉其在臨川也清明仁恕多省費方畧蜀
郡崇儒之化南陽均水之法精力區處民以便安田壤耕
闢獄犴清淨居一年璽書褒異就加金紫未幾而有容州
之拜且都督府所治列城十三訓戎撫俗之任招徠式遏
之寄非通方明畧無以威懷蓋皇慈所軫先於柔遠方將
布愷悌於夷落致風俗於休嘉議者以九伯二男可跂而
至天則不弔末如之何君直清篤厚博物通理有大學之
明誠大雅之疏達靜如淵泉動如鎔干不緇不磷與令聞

終始起布衣儒服位視方隅歸全之日纔具祭器去國見
麾幢之盛近葬備祔輶之儀列松楨於舊封展牲牢於新
薦哀榮之禮鄉黨稱焉初公娶京兆韋氏永州刺史采之
女繼室以博陵崔氏殿中侍御史殷之女皆淑明柔嘉不
幸早世允子曰郅曰邠年甫及齒哀如成人公仲兄新城
長伯倫以子夙承公歡且有遺託旣不獲讓是用直書銘
曰

信都九江文禮章章百代彌光司徒佐漢司農匡晉乃熾
而昌世無違德時有通塞或行或藏克生容州貴爲諸侯

其道直方政成中和播爲頌歌化被二邦列爵疏土燦爛
龜組鸞聲鏘鏘宜享繁祉以媚天子今也則亡還葬故里
僊山之趾德音不忘

朝散大夫使持節饒州諸軍事守饒州刺史上柱

國崔君墓誌銘

并序

博陵崔氏爲山東右族以政事方直稱者曰饒州刺史諱
適字某貞元十四年某月甲子寢疾終於所部之廨舍春
秋若干君仁厚信實方嚴清厲詞無枝葉而顧言必踐交
不諂瀆而與人必誠深於士行精於吏職蓋其天性然也

一命爲懷州參軍累遷至大理評事司直監察御史好時
武功二縣令常絳二州司馬乃理富平遂佐興元貞元十
一年春以西諸侯之師轉粟調食特拜倉部郎中兼御史
中丞以董其事其年冬徵拜衛尉少卿明年改鄧州刺史
麾蓋將行又換鄱陽厯官十五竟未充量其爲御史也賈
常侍至以才名尹轍下實所慰薦爲之賓介蔣常侍沈以
公廉幹河運交辟將事宏助居多其宰封畿也縣鄙之地
直於西郊禁衛之師勤於左次事爲之節官修其方軍興
人安闔境謠誦其佐晉陵也晉國韓公當撫封之重署爲

推官軺傳所至平反審克假守新定新定之人宜之薄於
進取未數月引去其領陵邑也充奉肅敬里閭均安黠吏
强家望風累息相率屏匿者十八九其分憂爲邦約已惠
人樂易而知禁清明而不擾此皆厯職必聞之效也至若
章章尤著爲士君子之所景行者則奉使西土鄙能言之
縣官以乘塞宿兵旌旄相望饋饗之重非君莫可旣而經
費出納制於中臺剋伐之人順非言利大率以布帛之不
中於度不鬻於市者積以竄濫備其名物移用於軍增三
倍之價平糶於人無一時之蓄掠是根本命爲奇贏旣喪

邊備實蔽理道時有覆視誨其相蒙徒列簿書之文不登
釜鍾之量因緣繆巧觸類而起君受命不苟臨事風生條
其積弊盡達聰聽雖狺狺之吠營營之飛置於度外不直
不已連章上懇詞旨深切羣情惴駭處之恬然謝病乞告
終無所屈皇明嘉納入亞九卿時搢紳之士多以憑暴爲
戒怵迫附離而不能自固者多矣如君之特立剛毅不更
其守古之儒行何以加焉此德輿所以受其孤之哀請而
不敢辭也君之曾祖元基皇朝散大夫會州長史祖紹先
皇揚州楊子縣尉父炅皇大理司直兼河南府河陰縣令

代名士行裕是遺烈初君娶於某氏某官某之女生子曰
包而歿繼室以某氏某官某之女皆有淑行如君之志以
十四年某月日叶用吉卜祔窆於河中某縣鄉原之舊封
禮也初包以德興朴而好直且嘗奉行君之命書者四乃
列其官簿次第俾識於墓石旣而包毀瘠滅性天於倚廬
之中諾其請矣故銘之曰

崔君之直兮不枉尺兮崔君之正兮不由徑兮展如之人
宜錫蕃祉今天實奈何一麾遄已兮檐檐帷裳來自鄱之
陽兮戔戔邱封葬於河之東兮刻此貞珉識清風兮